

## **Olwaandiko lwa Paulo hali Tito Obweébeembezi**

Olwaandiko olu lukaandikwa na Paulo, entumwa ya Yeezu Kristu. Obuchilo bugufu acháali kwaandika olwaandiko olu, Paulo akaba naakola emilimo ya Múungu hamo na Tito omu iziinga lya Kirete. Paulo kayaalugile okwo, yaámwaandikila Tito olwaandiko olu lwe ebilangilo habwo kwiimeelelela abeekiliza okwo Kirete. Akamuha Tito emilimo yo kutóoza abanyaampala be ekelezia. Káandi, akamuneembelela abone kubatiimbya emiganya abeekiliza ba Kirete, habwo kuba bakaba baliho abeégesa be ebisuba.

Ebinogoka bíenzi byo olwaandiko olu lwa Tito nibisusana bwooli ne ebinogoka omu lwaandiko lwo kubaanza lwa Paulo ahali Timoteo. Neesana nka nikwo enyaandiko ezi ibili zikaandikwa obuchilo búmo. Koólaayeénda kusoombookelwa bwooli echigaambo bunaanka éecho olaásaanga omu lwaandiko olu, nitukusaba oleebe omuli olwo lwaandiko lwo kubaanza lwa Paulo hali Timoteo.

### *Empola ya Paulo hali Tito*

<sup>1</sup> Olwaandiko olu naáyaandika ínye Paulo, omuzáana wa Múungu, ne entumwa ya Yeezu Kristu. Nkatumwa habwo kumanyisa abaantu abatooziibwe na Múungu, babone kumwiíkiliza na kugasoombookelwa amazima habwa Kristu.

Amazima ago, nigabooleka kugomookela Múungu,

<sup>2</sup> na nigabaha itegezo lyo obulami bwo obucha no obuchiile. Weényini Múungu akatweésagiza obulami obwo, buluga butakabaandize obuchilo, náwe tazila bisuba.

<sup>3</sup> Mbweenu ha buchilo bwoómwe alamwiile kwoóleka butúnu Empola yoómwe Nzima. Náwe Múungu Omuchuúnguzi wéetu akalagila nkokwo, nhaábwe emilimo yo kulaanga empola ezo.

<sup>4</sup> Niinkwaandikila íwe Tito, mwáana waanze wa amazima omu kwiikiliza óokwo tulikukoba hamo. Embabazi no obuhóolo kuluga hali Isíichwe Múungu, na hali Kristu Yeézu Omuchuúnguzi wéetu, bibe hamo neewe.

### *Emilimo ya Tito omu iziinga lya Kirete*

<sup>5</sup> Kanaalugileyo okwo Kirete, nakusaba íwe kusigalilayo obóne kutaho kuzima amagaambo ago agáandi agasigeele, hamo no kutóza abanyaampala be ekelezia omuli buli iboma, nko óokwo naákwoólekeeliile.

<sup>6</sup> Omunyaampala we ekelezia, naayeéndelwa kuba omuuntu óogwo aténa kutuúzilwa. Aábe íiba wo omukázi oómo weénka,\* abáana boómwe babe abeekiliza,† bataákuba abazilwa nali abatakukoondookela.

<sup>7</sup> Weényini niwe omwiímeelelezi, naayeéndelwa aábe omuuntu óogwo atakutuúzilwa, ha kuba aheelwe emilimo ya Múungu. Ataákuba omuuntu ogu ayina ihagi, aténa biniga, atali omutamiizi,

---

\* **1:6 1:6 Aábe íiba wo omukázi oómo weénka:** Ensoonga éezo eébe nka nikwo, *Ataákuba omusiihani.* † **1:6 1:6 Abeekiliza:** Ensoonga eéndi ni nka nikwo, *abatali abahwaáhwa.*

atali omusaámbe, káandi atéena etuúngu mbi yo kubonesa empilya.

<sup>8</sup> Náho aábe omufula, óogwo alikusemelezwa na amazima, wo okweétegeeleza, omugololoke, omutakatífu, owe okweetégeka.

<sup>9</sup> Aábe naakwaáta kuzima amagaambo habwa Kristu Yeézu nka nikwo yaáyegesiibwe, áago nigo galikweésigwa. Aho niho, yaakaáhicha kubakomeeza abaantu aha meégeso ago no kubasiinga abo abalikugahinyooza.

<sup>10</sup> Niinkugaambila iíntyó, ha kuba aho Kirete, baliho abaantu béenzi abo abatali abakoóndooki, boónyini nibagaámba empola ezitéena omugaso, káandi na ababéhi, muno muno na áabo abalugiliile omu diini yáabo ye Echiyahudi. Abo baantu ni lwaampaka obaángile kweégesa,

<sup>11</sup> ha kuba nibabahabisa abaantu omu mazu méenzi. Niboolekeelela empola éezo zitakween-delwa kweégeswa, babone kubonesa amabonwa ge ensoni.

<sup>12</sup> Aho kala, akaba aliho omubáasi oómo, ogwo mubáasi náwe akaba ali omunya Kirete. Weényini akagaamba aáti, “Abakirete na abatéezi be ebisuba ebilo byóona, baliho nke enyameéswe eziluluhile, beena omuhaánka, káandi na abaléenga!”

<sup>13</sup> Okwaátula okwo no kwa mazima. Ha bwéecho, abaantu nka abo, oóbe noobakáama ha cháaha, obóne kubazuna babone kukomeela habwa Ameégeso go kwiikiliza kwa amazima.

<sup>14</sup> Baléke kweétegeeleza káandi emigani za Abayahudi ezitazilamo omugaso, ne ebligilo bya abaantu kwoónka áabo abalekile amazima.

<sup>15</sup> Mbweenu, musoomboókelwe nka nikwo, ha baantu abeena omwooyo gulikwéela omu méeso ga Múungu, ebiintu byóona, byeelízwe ti bilofo. Náho, ha baantu abalofo na abatakumwiíkiliza Múungu, ebiintu byóona omuli boónyini ne ebilofo, ha kuba ebiteékuzo byáabo ne emiganya yáabo, eyizwiile obulofo.

<sup>16</sup> Boónyini nibagaamba nkokwo nibamusoomboókelwa Múungu, náho ebikolwa byáabo nibyooleka nka nikwo nibamwaánga. Abaantu abo nibatamisa, na tibakumukoondookela, tibakugasa ha chigaambo choóna chóona echizima.

## 2

### *Ameégeso ga amazima*

<sup>1</sup> Óobu íwe Tito, oóbe nooyegesa abaantu amaagambo kwiingana na ameégeso ga amazima.

<sup>2</sup> Oóbe nooyegesa abanyaampala, bazile okwiibalilila, isima, abeena kweétegeeleza, bakwaatilile kuzima ameégeso go okwiikiliza kwéetu, bazile engoonzi za amazima aha báandi, na bagime omu kweéyomeleza.

<sup>3</sup> Bityo nyini, na abakeékulu nábo, obeégesese babe na akazeendele áako akalikumukúza Múungu. Bataákuba abanyeegani, bataba abatamiizi, náho babe nibeegesa amazima,

<sup>4</sup> kuba babone kweégesa abakázi abahalákazi, kweenda beebabo na abáana báabo.

<sup>5</sup> Káandi, babeégesese babe no okweétegeeleza, bazile emiganya elikwéela, bakole kuluunzi emilimo omu nzu záabo, babe ne entúungwa nzima, na abalikubazilila isima beebabo. Beegéswe

bazile bátyo, kuba batachikola echigaambo cha Múungu kulyoogweezwa.

<sup>6</sup> Bityo nyini, ha bahalákazi na abasigazi, obaháne babe no okwiibalilila.

<sup>7</sup> Neewe, nooyeendelwa oóbe nookola ebizima hali buli kaantu kóona, obóne kuboóleka emanyiso zo kweéyegaho. No omu meégeso gaawe, oóbe nooyoleka amazima ni isima.

<sup>8</sup> Ameégeso gaawe, gabe ga mazima áago agatakunugwa na abaantu, ha kuba bóona abalaayeenda kugagaya, bakolwe ensoni, habwo kuba nibabulwa echigaambo chibi cho kutunyeega.

<sup>9</sup> Abahálila nábo, obeégeso kukoondoókela abakáma báabo, babe nibabanuliza omu magambo góona, batahakana nábo.

<sup>10</sup> Batabeébila, náho babe abeésigwa hali byóona, emilimo yáabo yóona ebone kukola abáandi kunulilwa Ameégeso ga Múungu Omuchuúnguzi wéetu.

<sup>11</sup> Oóbe nooyegesa amagaambo ago, ha kuba embabazi ya Múungu éezo elikuchuúngula abaantu bóona yaáchiingulilwe.

<sup>12</sup> Embabazi ezo, neetweegesa kwáanga obuzilwa ne etuúнку ze éensi. Ha bwéecho, obuchilo tuli omu nsi ezi tube no okweébalilila, tube ne entúungwa nzima, na tube abalikumugomookela Múungu.

<sup>13</sup> Twiikale tútyo, obuchilo nitutegeza itegezo lyo omugisa lyo kusuba kwa Yeézu Kristu. Echilo echo, alaábonwa omu ikuzo lyoómwe. Weényini niwe Múungu wéetu Mukúlu na niwe Omuchuúnguzi wéetu.

<sup>14</sup> Weényini akeésohoza kufwa ha bwéetu, abone kutuchuúngula, tweekala tweéyagaalwiile kuluga omu biheni byóona, no kutwéeza, tubone kuba abaantu boómwe ba amazima, áabo abalikweéyemaho ha chihika kukola ebizima.

<sup>15</sup> Mbwéenu óobu, okozese obuzizi bwaawe omu kweégesa ago góona, omu kugumisa no omu kuhana abaantu. Ha bwéecho, oteekiliza kugaywa no omuuntu weéna weéna.

### 3

#### *Kukola ebikolwa bizima ha baantu bóona*

<sup>1</sup> Oóbe noobeezuka abaantu nka nikwo, babe ni isima no obukoondooki ha batwaáliliza na ha batégeki. Na babe bweémi kukola buli chigaambo echizima.

<sup>2</sup> Káandi obagaambile nka nikwo, batamuzuma omuuntu weéna weéna, bataákuba abalwaani, babe abateékaani abalikweenda obuhóolo, na babe abalikweécheesha ha baantu bóona.

<sup>3</sup> Aho kala, obuchilo tukaba tuchaali kumwiikiliza Yéézu, íichwe neechwe tukaba tuli abafweéla, abagome, káandi twaábeéhilwe. Tukaba tuli abahálila be etuúngu mbi ze éensi na ameele bunaanka bunaanka. Obulami bwéetu bukaba buli bwo kukola amábi ni ichubi. Abaantu bakaba nibatutamwa, neechwe tukaba nitubatamwa.

<sup>4</sup> “Náho, Múungu Omuchuúnguzi wéetu, yaáyolekile nka nikwo weényini ni muzima na naayeénda abaantu bwooli, yaátuchuúngula,

<sup>5</sup> tiyo habwo kuba, íichwe tukakola echigaambo choóna choóna echizima, náho na habwe echiganyizi choómwe. Akatuchuúngula aha muháanda gwo kutwéeza ebiheni byéetu, omu

kutuzuuala olwa kábili. Káandi atuheéle obulami obusha ha muháanda gwo Omwooyo Mutakatíifu.

<sup>6</sup> Múungu akatuseesela Omwooyo Mutakatíifu ha bwíinzi, kulabila hali Yeézu Kristu Omuchuúnguzi wéetu,

<sup>7</sup> na habwo kuba twaámazile kubalwa kuba abagololoke habwe embabazi zoómwe, óobu nituregeza kuhuungula obulami bwo obucha no obuchiile.”

<sup>8</sup> Obusoomboozi obu no bwo kweésigwa. Na habwa ago góona, niinyeénda íwe ogakomeenteleze bwooli, kuba abo abamwíikilize Múungu bataákuleka kuba no bweeyomeleza bwo kukola ebizima. Amagaambo ago ni mazima, káandi geena omugaso ha baantu bóona.

<sup>9</sup> Náho, oyélige no obuhakani bwe echisilu, no kweébuga ha maziína ga baguúku, ne endwaana ne emyeéhakaniso habwe ebilangilo bya Musa. Ago góona tigéena mugaso gwoóna gwóona.

<sup>10</sup> Omuuntu óogwo alikuteélanisa abaantu, omuháne entúlo ya mbele, káandi omuháne entúlo ya kábili. Kaálaaba ataákuhulila, omwáange.\*

<sup>11</sup> Koólikusoombookelwa nka nikwo, omuuntu nko ogwo yaálekile amazima, naazeendelela kukola ebiheno. Weényini naayechwaaziikila weénka.

### *Empola zo kulaga*

<sup>12</sup> Naálamula kuzeenda kwiikala omu chaalo cho okwo Nikopoli, omu buchilo bwe embého. Náho, niimmusiindikira Aritema, nali Tikiko okwo

---

\* **3:10 3:10 Omwáange:** Aháandi yakáaba, *mutaatuluzane nali olekáane náze.*

owaáwe. Kaálahikayo okwo, íwe laanguha kwiiza Nikopoli tubonane.

<sup>13</sup> Ozile obweéyomeleza kuhweela Zena, ogwo omutoóngani, na Apolo. Obáhe byóona byo kubazuna omu muháanda, bataákubulwa kaantu.

<sup>14</sup> Abeekiliza bazeenzi béetu nábo, beéyege kukola ebizima, bahiche kusuumbuusa abaantu ebyo kubagasa. Kábalaakola bátyo, obulami bwáabo nibuzila omugaso.

<sup>15</sup> Abaantu bóona abali hamo neenye aha, nibakwaángalucha. Mbweenu óobu neewe, obaángaluche abeekiliza abe engoonzi bóona. Embabazi ya Múungu eébe hamo neemwe mwéena.



**Endagano Eénsha omu Chiziinza**  
**Portions of the Holy Bible in the Zinza language of**  
**Tanzania: Endagano Eénsha omu Chiziinza (New**  
**Testament+)**

copyright © 2024 Wycliffe Bible Translators, Inc.

Language: (Zinza)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

---

PDF generated using Haiola and XeLaTeX on 10 Jul 2025 from source files dated 10 Jul 2025

ec04e043-ebb2-5393-a814-029b879f102a